

Seghiton a jir inant, segures che nesc cater amisc i volessa coscita e i ne stèsc apede

Gino Comelli, capostazion del socors: L'é na tragedia che lascia mile domanes senza risposta, ma sion segures de aer fat la roba giusta e de cogner seghitèr a jir inant



L capostazion del Socors de l'Auta Fascia Gino Comelli.

La chiamèda per jir a fèr la miscion de socors te Val Lasties é peèda via da Gino Comelli, capostazion dal 1989. L'é el l responsàbol de duc i voluntadives e de duc i intervenc, apede che di materiè e di efec personè de chi che vegn recuperé. N emegn che vegn portà inant a nivel de voluntariat, con pascion e profesionalità, ma senza paament, e con na gran responsabilità, tant ti confron de la jent che se troa tel pericol che di componenc del socors. Dò 20 egn de esperienca con 1500 intervenc, senza mai n azident maor che na radio perduda o na cevila sfeneta, ades na legnèda coscita... Aon rejonà con Comelli de coche vegn endrezà e dezidù i intervenc de socors, del peis che chesta tragedia arà tel davegnir del socors, e de chisc bec, che per el i era mingol desche fies.

Gino, siede Vo a endrezèr i intervenc de socors, a dezider se jir fora e chi manèr. Aede ben na gran responsabilità...

Gino Comelli: "Ei, gé son l responsàbol de la miscion. Aon più squadres, e posse ence tirèr fora da na squadra o da n'otra chi che me serf e meter ensem a base a la califiches e a la desponibilità. Ma dant de pontèr via fae semper na verifica con duta la squadra, donca posse dir che son responsàbol de la dezijions che aon tout duc ensem."

Co él endrezà i socors chiò te Fascia?

"Te Fascia l'é trei stazions del socors. Una a Moena, una per l Zenter e una per l'Auta Fascia. En dut saron 70 o 80 voluntadives con califiches desferentes aldò di cors de formazion che na persona à fat: operadores del socors, tecniches del socors e de l'elisocors, istrutores regionèi o te nosc cajo provinziei, e istrutores nazionei."

Co se fèjel a doventèr voluntadives del socors da mont?

"Per ruèr ite se pel fèr la domanda canche se à 18 egn. Se cogn esser bogn de jir coi schi e a crepes, se cogn prejentèr n curriculum e dapò vegn fat na selezion, con proes sun vies de 4° o 5° grado, manovres de corda, coi schi da alpinism tant en su che en ju, proes su la giacia. L'é n ejam n muie seletif e no duc rua ite, ma l'é n muie de joegn che domana de vegnir touc ite, ence se te etres setores del voluntariat somea che se fae fadia a tor ite i joegn."

E dut per n gran emegn che no vegn paà...

"Jir sa mont l'é na gran pascion, l'é chesta che ne spenc, e per n muie l'é ence na tradizion de familia, tramanèda adertura dal gïaf al père, che ence i fies ge va dò. E jir sa mont no l'é demò bel, ma se va con n spirit fon, de chest spirit fesc pèr la solidarità che l'é n sentiment che se à daite."

Ma anchecondi de spes la jent che va sa mont la pertèn massa dai voluntadives, la domana aiut ence canche no fossa besegn...

"Segur la é coscita, ma per chest no me sà che se posse fèr trop. Con duta la jent che rua sa mont, ite per anter n'é n muie che no i é enjigné, soraldut d'istà. Se i chiama se cogn bele jir, ence perché no duc à la medema toleranza al dolor: magari chel che ciga più debel l'à demò na cevila storta, e chel che somea chiet l'é béleche mort..."

Capitel che dezidassède de no jir fora?

"Ei, capita per ejempie canche zachei no se à fat mèl, ma per n fal de valutazion alpinistica se troa a restèr sui crepes de net. Te chisc caji, se vedon che la condizions del temp les permet de poder stèr sù senza pericol, speton fin l'indoman. Magari l'é les undesce de net e ic i é a sosta, se cognassane jir sù de net e i calèr jù, fenissane da les 5 dadoman, ma da les 6 l'é l'elicoter e te n chèr d'ora i fossa a Cianacei. Per ic ruèr ju n'ora dò no cambia trop, ma per nos cambiassa n muie."

A propojit de l'elicoter, zachei à dit che con l jolier de net chesta desgrazia aessa podù vegnir schivèda...

"Ben segur che se saesse de aer a la leta ence chest meso, cambiassa duta la strategies de intervent. Te chest cajo enzeve che manèr la jent jù per Pordoi se aessa podù fèr na recognizion co l'elicoter te la Val Lasties e veder la pedies de la cèspes che jia ite te la levina, e dapò alò se aessa podù jir col cian o se no, se ic i aessa abù l'arva, da l'elicoter te podees ciapèr l segnèl e manèr jù una o doi persones: se te veides che no l'é più nia da fèr per i salvèr, te pes i lascèr alò e no meter en pericol i etres. Ma perche chest se possìbol cognarà passèr amò n muie de egn..."

Che ge volessel per poder aer l'elicoter de net?

"Per fèr viajèr l'elicoter cognessa esser na net beliscima, senza nigoles e senza n fil de vent. L viajassa a vista, col canocèl coi infrarosc, ge vel n gran alenament per l team e fossa speises n muie autes, ence per la ejercitazions. L'é dut tecnologies militères. Se ades n intervent l costa sui 4 mile euro, de net l vegnissa a costèr entorn i 40 mile. Chiò te Fascia aldidanché no se fossa enjigné nience demò per fèr ruèr e pontèr via n elicoter de net per ruèr prest a l'ospedèl: te duta la val de Fascia no l'é nience n piaz per l'ateraje de net, ge volessa che l'aministrazions se cruzie ence de chest."

En ogne cajo durèr l'elicoter per fèr socors de net servissa a meter al segur i omegn su la tera, ma no chi che l'é su l'elicoter. L'é desche ge trèr la bala fersa a zachei de etres e desciazièr l peis de la responsabilità: l 118 me passa la chiamèda a mi, gé ge la passe a chi etres, dapò chi etres i ge la passerà... gé no sé... ai astronauti... I soi che va a fèr socors de net co l'elicoter l'é i svizeres, che i é fora da l'Union Europea, ma l pericol de sutèr jù con l'elicoter de net l'é amò maor; te la Svizera te 20 egn sarà sutà jù 10 elicotres, con 10 equipages... vel dir 40 persones mortes."

Zachei à dit che te chest intervent l'era massa pericol, che no se aessa cognù jir. Co él che vegn tout la dezijions te chisc caji? Él giust jir semper, él tel spirit del socors?

"Ei, jir semper canche zachei domana aiut l'é tel spirit del socors, ma valuton delvers chel che fajon, olache jon, che materièl che cognon tor. Saon ben duc co fèr. Chel di l'é stat fat duta la conscidrazions: l pericol de levines a Trent l vegnissa dat a 4, ma l Trentin l'é gran e Trent l'é a 100 chilometri da chiò. Rèba,



I voluntadives de l'Aiut Alpin de l'Auta Fascia endèna na ejercitazion de socors.

che la é a 20 chilometri, la dajea 3, se no jon fora con grado 3, stajon a cèsa dut invern. Gé siere fora da dut l di coi schi, co la sera vegnia semper più freit e l maor pericol l'é tel prum domesdi, te la ores più ciaudes. Tel prum domesdi l'era jit ju per Val Lasties ence Tone Valeruz, e l ne à dit che a jir ju dò sia loses jane segures."

Che pissède de la polemiche che l'é stat fat sui sfoes?

"Nos aon semper chieri de troèr la soluzion miora, e ence chest'outa la é stata coscita. Dò l'é ben sori parlèr, ma chesta parlèdes é vegnudes più che auter da jent che sa mont e a fèr socors la vegn pech o nia. No l'é da ge dèr peis."

E de chel che à dit Bertolaso?

"Bertolaso l parlèa a nivel nazionei, e no l'aea dut i torc: stroz per la Tèlia i é n muie endò desche cultura alpinistica respet a la realtà del Trentin. Chiò l'é n'otra mentalità... però les pel capitàr ence chiò."

Che efet èla su la squadra na tragedia coscita? Portela dubies e tema de jir inant o deidela a tegnir ensem?

"Se dant siane na squadra forta, ades sion na squadra amò più forta, l'é n mur, sion "un per duc e duc per un". Duc chenc sion segures de la dezijions che aon tout, no aon dubies sun chel che aon fat. Te la Val Lasties te 20 egn aron fat passa 100 intervenc, e tropes con condizions più senestres, tant da cogner jir su col GPS per saer olache siane e co vegnir de retorn."

Chest fat mudarèl vèlch te la vida de fèr socors?

"Mah, zeche mudarà segur, percheche ence la esigenzes del socors les é mudèdes. Acà 20 egn, canche gé é tacà, se fajea 50 o 60 intervenc a l'an, chest an passà

n'aon fat 120. Fèr l volontadif del socors vel dir molèr dut e jir. Aon fat ence 5 o 6 intervenc te na di, che vel dir stèr fora dut l di, lascian endò l lurier..."

Valgugn à dit che chest servije cognessa vegnir paà...

"Zeche l'é da fèr. L socors l'é n servije indispensàbol e de gran responsabilità, tant ti confron nesc che soraldut de chi che cognon jir a didèr. N muie i é ence menacres e maestres de schi, i é profesionisè de la mont, e duc a fat e i va inant a fèr corsc de socors. Ence se no sion duc profesionisè zenzauter sion duc profesionèi. Una de la proponetes fossa l servije de "guardia attiva", che vel dir meter zachei che da doman fin da sera stesc alò a gestir i intervenc. Fossa n intervent programà, e chiò da nos e te temp de sajón l'é ogne di zeche. Ades vegn paà demò l servije di istrutores e di elisocoridores, che i é a disposizion dut l di e ge vegn dat na retribuizion, ence se de segur no grana. Zeche sarà da fèr, cognaron mudèr endrez, scomenzèr a fèr turni de reperibilità e i paèr."

Chesta l'é stat na perdita tremenda a nivel uman, ma la pesarà ence te l'organizacion del socors tel davegnir, ajache l'é mencià 4 di miores voluntadives...

"Te noscia squadra l'é restà chest gran vet e ge volarà n muie de temp per ruèr a l corir, ma aon abù manifestazions de solidarità da n muie de jent e duc a dit de chiamèr se l'é de besegn. Ence menacres da fora, che i é chiò demò per n trat, i me à dat duta sia desponibilità."

Coluns él stat Vesc pensieres te chisc di?

"Mie prum pensier l'é stat: Ma te chel moment l Segnoreddie érel ut de schena? Él possìbol che ne rue na legnèda cosci? Jane a didèr jent che à chiamà aiut, no a se fèr na raida... L'é chela robes che no à resposta... la é jita coscita. Posse demò pissèr che l se n'à tout 4, e i aessa podù esser duc 7, o 5: Sergio l'é stat 1 ora e 10 menuc sot ite. Un i ne l'à regalà. Però chisc cater... l'é n valor che no se pel mesurèr..."

Per l socors l'é na manconia graniscima, e l recognosciment se l veit, me rua cassettes entries de telegrams, stimes da duta la Tèlia e ence da fora... duc ne disc de jir inant, che chel che aon fat l'era giust. Ogne di che passa gé - ma spere ence chi etres de la squadra - son semper più segur de chel che aon fat, de coche se aon comportà. E son segur che chest l'era ence l pensier de Luca, Alex, Erwin e Diego. E sul davegnir per me fossa proprio n gran tort dir de no jir più fora de net; l'aon semper fat e jon inant coscita. Se sà che seghiton a pissèr a chel che l'é sozedù, però se cogn ence jir inant."

Lucia Gross/Valentina Redolfi